

საგანგებო სიტუაციების მართვის გეგმა

2020

საგანგებო სიტუაციების მართვის გეგმა

1. შესავალი

კავკასიის უნივერსიტეტის (შემდგომში - ორგანიზაცია) საგანგებო სიტუაციების მართვის გეგმა შემუშავებულია „სამოქალაქო უსაფრთხოების შესახებ“ საქართველოს კანონის, „საგანგებო სიტუაციებზე რეაგირების ძალების წესდების დამტკიცების შესახებ“ საქართველოს მთავრობის დადგენილების, „საგანგებო მართვის გეგმის მომზადების წესების შემუშავების შესახებ“ საქართველოს მთავრობის დადგენილებისა და საერთაშორისო სტანდარტებით აღიარებული მეთოდების საფუძველზე.

გეგმის მიზანი - გეგმა განსაზღვრავს ორგანიზაციის საგანგებო სიტუაციებზე რეაგირების ეფექტურ მიმართულებებს და ღონისძიებებს. ასევე, მართვის პროცესის განხორციელებას საობიექტო დონეზე.

გეგმის მიზანია ბუნებრივი და ტექნოგენური ხასიათის, ასევე ეპიდემიოლოგიურ საფრთხესთან დაკავშირებული საგანგებო სიტუაციებისაგან თანამშრომელთა და სტუდენტთა საგანგებო დაცვის საერთო ორგანიზაციულ-სამართლებრივი ღონისძიებების წარმართვა. ასევე, საგანგებო სიტუაციების თავიდან აცილების, მისი განვითარების შემთხვევაში შედეგების შერბილებისა და ლიკვიდაციის ღონისძიებების შემუშავება/ორგანიზება და შესაბამის პირთა კოორდინირებული ქმედებების უზრუნველყოფა.

2. ტერმინები და განმარტებები

საგანგებო სიტუაცია – ობიექტზე, გარკვეულ ტერიტორიაზე ბუნებრივი მოვლენების, სტიქიური უბედურების, ხანძრის, ავარიის, კატასტროფის ან სხვა სახის უბედურებების, აგრეთვე დაზიანების საბრძოლო საშუალებათა გამოყენების შედეგად წარმოქმნილი სიტუაცია, როდესაც ირღვევა ადამიანთა ცხოვრებისა და საქმიანობის ნორმალური პირობები, საფრთხე ემუქრება მათ სიცოცხლესა და ჯანმრთელობას, ზარალდება მოსახლეობა და ზიანდება ბუნებრივი გარემო;

საგანგებო სიტუაციის ზონა – განსაზღვრული ტერიტორია ან აკვატორია, სადაც წარმოიქმნა საგანგებო სიტუაცია;

საგანგებო სიტუაციის თავიდან აცილება – სამართლებრივ, ორგანიზაციულ, ეკონომიკურ, საინჟინრო-ტექნიკურ, სანიტარიულ-ჰიგიენურ, სანიტარიულ-ეპიდემიოლოგიურ და სხვა ღონისძიებათა კომპლექსი, რომლებიც ხორციელდება ბუნებრივ გარემოსა და საშიშ საწარმოო ობიექტზე მონიტორინგისა და კონტროლის ორგანიზების, საგანგებო სიტუაციის წარმოქმნის პროგნოზირებისა და პროფილაქტიკის, საგანგებო სიტუაციისათვის მომზადების, ხოლო მისი წარმოქმნის შემთხვევაში – ზარალის შემცირების მიზნით;

სახანძრო-სამაშველო დანაყოფები – სახანძრო დაცვისა და სამოქალაქო თავდაცვის საქმიანობის განმახორციელებელი სახელმწიფო ორგანოები.

3. მოსალოდნელი საფრთხეებისა და რისკების შეფასება

კავკასიის უნივერსიტეტი მდებარეობს ქ.თბილისის მუნიციპალიტეტში (ქალაქში). იგი მდებარეობს ზომიერი მიწისძვრის ინტენსივობის რაიონში. მისი განთავსების ტერიტორია მოქცეულია შემდეგი ბუნებრივი საფრთხეების ზემოქმედების ტერიტორიაზე: (მეწყერი, ღვარცოფი, წყალდიდობა და. ა. შ.); „ორგანიზაციის“ ტერიტორია ემიჯნება საცხოვრებელ შენობებს.

4. ობიექტის დახასიათება

უნივერსიტეტის ცალკე მდგომი შენობა არის ოთხსართულიანი მონოლითური აგებულების, რომელთანაც განთავსებული გარე პარკინგი. ტერიტორიაზე განლაგებულია ბლოკით ნაშენები სასაწყობე ფართები. შენობას აქვს 3 საევაკუაციო გასასვლელი, რომელიც მიემართება გარეთ და აკმაყოფილებს კანონმდებლობით გათვალისწინებულ მოთხოვნებს. უნივერსიტეტის ტერიტორიაზე განცალკევებულ ნაგებობაში განთავსებულია ცენტრალური გათბობისა და გაგრილების სისტემები, რომელიც აკმაყოფილებს ხანძარსაწინააღმდეგო მოთხოვნებს. შენობა უზრუნველყოფილია წყლითა და ელექტროენერჯით. მათი ჩამკეტი/გამშვები მარეგულირებელი მოწყობილობების და გაყვანილობის არასწორი ექსპლუატაციის გამო შესაძლოა წარმოიქმნას ხანძარი/აფეთქება. გაზის მიწოდება ხორციელდება განცალკევებულ ნაგებობაში (საქვაბეში). შენობაში არის დამონტაჟებული შიდა ხანძარსაწინააღმდეგო წყალმომარაგება, რომელიც აკმაყოფილებს სახანძრო ნორმებსა და წესებს. ობიექტს გააჩნია კვამლსაწინააღმდეგო ვენტილაცია, რომელიც აკმაყოფილებს სახანძრო ნორმებს. შენობაში დამონტაჟებულია, როგორც სახანძრო სიგნალიზაცია და განთავსებულია საევაკუაციო გეგმები.

5. უნივერსიტეტის პერსონალის და სტუდენტების სწავლება

უნივერსიტეტის პასუხისმგებელი პირების, პერსონალისა და სტუდენტების გადამზადება ითვალისწინებს მათთვის საგანგებო სიტუაციების დროს ქვევის წესების გამომუშავებას, მათი შრომითი და საწარმოო-ტექნოლოგიური უსაფრთხოების ამაღლებას. უნივერსიტეტის პასუხისმგებელი პირების, პერსონალისა და სტუდენტების სწავლება ხდება უშუალოდ ადგილზე, სულ მცირე ექვს თვეში ერთხელ.

საგანგებო სიტუაციების მართვის შტაბის წევრთა ფუნქციონალური მოვალეობები საგანგებო შტაბის შეტყობინების სქემა

6. საგანგებო შტაბის შემადგენლობა:

1. საგანგებო შტაბის უფროსი;
2. საევაკუაციო ჯგუფის უფროსი;
3. შეტყობინებაზე პასუხისმგებელი პირი;
4. ექიმი;
5. სახანძრო ჯგუფის უფროსი;
6. წესრიგის დაცვის ჯგუფის უფროსი;

7. საგანგებო სიტუაციების მართვის შტაბის წევრთა ფუნქციონალური მოვალეობები

7.1. საგანგებო სიტუაციების მართვის შტაბის უფროსი

უნივერსიტეტის საგანგებო შტაბის უფროსი ანგარიშვალდებულია, ზემდგომ დარგობრივი ხელმძღვანელობის წინაშე. იგი პასუხისმგებელია „ორგანიზაციის“ საგანგებო სიტუაციებზე მუდმივი მზადყოფნისათვის, რეაგირების დაგეგმვისა და შესაბამისი ღონისძიებების გატარებაზე მშვიდობიან და ომის შემთხვევაში.

მას ევალება:

- “ორგანიზაციის” საგანგებო სიტუაციებზე რეაგირების გეგმის შედგენა და მისი ამოქმედება საგანგებო სიტუაციების დროს.
- თანამშრომლებისათვის საშიშროების შესახებ შეტყობინება და შესაბამისი ქმედებების ორგანიზება.
- მართვის და შეტყობინების ორგანიზება.
- თანამშრომელთა დადგენილი წესის მიხედვით დროული ევაკუაცია უსაფრთხო ადგილებში.
- ექსტრემალური სიტუაციების განვითარების შემთხვევაში სამაშველო და სხვა გადაუდებელი სამუშაოების ჩატარება.
- ორგანიზაციაში ყველა დონის სამოქალაქო თავდაცვისა და საგანგებო სიტუაციების დროს მოქმედებების სწავლების ორგანიზება და განხორციელება.

7.2. საევაკუაციო ჯგუფის უფროსი

საევაკუაციო ჯგუფის უფროსი ექვემდებარება საგანგებო შტაბის უფროსს იგი ვალდებულია:

- შეიმუშაოს „ორგანიზაციის“ ევაკუაციის გეგმა;
- განსაზღვროს შენობის საევაკუაციო გზები და გასასვლელები, იზრუნოს მათზე მანიშნებელი ნიშნების დაყენებაზე;
- ორგანიზება გაუკეთოს თანამშრომელთა რაოდენობის განსაზღვრას მათი ოპერატიულად ევაკუაციის მიზნით;
- მონაწილეობა მიიღოს ევაკუაციის შემთხვევაში ევაკუირებულთა მომარაგებაში პირველადი მოხმარების ნივთებით;
- აქტიური მონაწილეობა მიიღოს ობიექტის რეაგირების გეგმის შემუშავებაში, ევაკუაციას საკითხების დაზუსტებაში;
- საგანგებო სიტუაციების შემთხვევაში იცოდეს და წინასწარ ჰქონდეს მომზადებული თანამშრომელთა უსაფრთხო ადგილებში გადაადგილებისათვის საჭირო მონაცემები;
- ევაკუაციის გამოცხადების შემთხვევაში იგი ვალდებულია:
 - ა) სპეციალური სიგნალებით, დროულად შეატყობინოს თანამშრომლებს ევაკუაციის დაწყება;
 - ბ) ორგანიზება გაუკეთოს დანიშნულ დროში სრული შემადგენლობით თანამშრომელთა გამოცხადებას შემკრებ პუნქტზე, მათი უსაფრთხო ადგილებში გადასაცვანად.

7.3. შეტყობინებაზე პასუხისმგებელი პირი

შეტყობინებაზე პასუხისმგებელი პირი ექვემდებარება საგანგებო შტაბის უფროსს და იგი ვალდებულია:

- აქტიური მონაწილეობა მიიღოს რეაგირების გეგმის შემუშავებაში.
- ორგანიზება გაუკეთოს მართვის, კავშირისა და შეტყობინების მუდმივ მზადყოფნას.
- დროულად განახორციელოს შეტყობინება ხელმძღვანელი პირების და პერსონალის საგანგებო სიტუაციებზე რეაგირების ღონისძიებების განხორციელების თაობაზე.

7.4. ექიმი

ა) ექიმის მოვალეობები მშვიდობიან პირობებში:

- შესაძლებლობისა და კომპეტენციის ფარგლებში ზრუნავს პერსონალისა და სტუდენტების ჯანმრთელობის დაცვაზე;
- ატარებს გეგმით გათვალისწინებულ ტრენინგებს სამედიცინო უსაფრთხოების თემებზე;
- აღმოუჩენს პირველად სამედიცინო დახმარებას დაზიანებულ ადამიანებს;

ბ) ექსტრემალურ ვითარებაში :

- ადგილზე აღმოუჩენს პირველ სამედიცინო დახმარებას დაზარალებულებს, რომლებიც შემდეგ გადმოჰყავთ უსაფრთხო ადგილებში;
- საჭიროების შემთხვევაში დაზარალებულები გადაჰყავთ სამედიცინო დაწესებულებებში სამკურნალოდ;
- „ორგანიზაციაში“ შექმნილი საგანგებო ვითარების შესახებ აცნობებს შესაბამის მუნიციპალურ სამედიცინო დაწესებულებას.

გ) ეპიდემიოლოგიური საფრთხისას, უნივერსიტეტის ადმინისტრაციას ხელს უწყობს საჭირო ღონისძიებების განხორციელებაში, ასევე უფლებამოსილია გასცეს დამატებითი რეკომენდაციები უნივერსიტეტის თანამშრომლებისა და სტუდენტებისათვის.

7.5. სახანძრო ჯგუფის უფროსის ამოცანები:

ა) მშვიდობიან პირობებში:

- ჯგუფის უფროსი მოვალეა იცოდეს ჯგუფის პირადი შემადგენლობა, მათი მომზადების დონე, სამუშაო ადგილი. ჰქონდეს ჯგუფის პირადი შემადგენლობის სია საჭიროების შემთხვევაში მათი სწრაფი შეკრებისათვის;
- შეისწავლოს “ორგანიზაციის” შენობა და ელექტროგაყვანილობა სახანძრო დაცვის თვალსაზრისით;
- იცოდეს ელექტროენერჯის მოწოდების წყარო, მისი საერთო გამომრთველის ადგილმდებარეობა, ელექტროგაყვანილობის ვარგისიანობა, სუსტი ადგილები;
- სისტემატიურად ახორციელებდეს ხანძარსაწინააღმდეგო პროფილაქტიკურ ღონისძიებებს; უნდა ამოწმებდეს ელექტრო ხაზების მდგომარეობას, ტერიტორიის დასუფთავებას, ცეცხლმაქრი საშუალებების მარაგის არსებობას და სხვა;
- უნდა ატარებდეს, როგორც თეორიულ ასევე პრაქტიკულ მეცადინეობას პირად შემადგენლობასთან.
- იცოდეს “ორგანიზაციაში” პერსონალის რაოდენობა, ავარიის შემთხვევაში მათთვის დახმარების გაწევის მიზნით.

ბ) ექსტრემალური ვითარების განვითარებისას

ჯგუფის უფროსი მოვალეა სწრაფად შეკრიბოს ჯგუფის პირადი შემადგენლობა

- მოკლედ განუმარტოს შექმნილი ვითარება, თითოეულ წევრს დაუსახოს ამოცანები;
- სისტემატიურად ახსენებდეს საგანგებო შტაბის უფროსს გაწეული საქმიანობის შესახებ;
- სასწრაფოდ შეატყობინოს არსებული სიტუაცია შესაბამის საგანგებო სიტუაციების მართვის

ორგანოს.

- არსებული საშუალებების გამოყენებით განახორციელოს ცეცხლის ქრობა და მისი ლოკალიზირება, თუ მის სიცოცხლესა და ჯანმრთელობას საფრთხე არ ემუქრება.
- ადგილზე მოსულ მეხანძრე-მაშველებს მოახსენოს საქმის ვითარება.

7.6. საზოგადოებრივი წესრიგის დაცვის ჯგუფის უფროსი

- საგანგებო სიტუაციების განვითარების შემთხვევაში უზრუნველყოს ჯგუფის ოპერატიული შეკრება;
- დაიცვას წესრიგი საგანგებო სიტუაციებზე რეაგირების პროცესში;
- უზრუნველყოს საევაკუაციო ღონისძიებების ორგანიზება და წესრიგის დაცვა მისი განხორციელების პროცესში;
- სასტემატიურად ჩაატაროს გეგმით გათვალისწინებულ თემებზე, როგორც თეორიული, ასევე პრაქტიკული მეცადინეობები პირად შემადგენლობასთან;
- რეგულარულად შეამოწმოს საევაკუაციო გასასვლელების მდგომარეობა.

8. ეპიდემიოლოგიურ საფრთხესთან დაკავშირებული ღონისძიებები

ქვეყანაში ეპიდემიოლოგიური საფრთხის არსებობისას უნივერსიტეტი შეასრულებს შესაბამისი სახელმწიფო ორგანოების მითითებებსა და რეკომენდაციებს, საჭიროების შემთხვევაში უზრუნველყოფს სამუშაო ადგილზე მოქნილი სამუშაო რეჟიმის შემუშავებასა და განხორციელებას, მათ შესახებ ინფორმაციის პერსონალისათვის და სტუდენტებისათვის მიწოდებას, ავადმყოფობის გამო შვებულების პოლიტიკის მოქნილობას და საზოგადოებრივი ჯანდაცვის შესახებ მითითებებთან მისი შესაბამისობას.

უნივერსიტეტის ადმინისტრაცია უზრუნველყოფს ჰიგიენის და ინფექციის კონტროლის სათანადო პრაქტიკის განხორციელებას, მათ შორის:

- ხელების ხშირი და გულდასმით დაბანის ხელშეწყობა;
- ხელის დასაბანი ადგილის გამოყოფა თანამშრომლებისა და მესამე პირებისთვის;
- ხელის დაბანის შეუძლებლობის შემთხვევაში, გამოყენებულ იქნება სულ მცირე 70% ალკოჰოლის შემცველი ხელის გამწმენდი სითხე;
- თანამშრომელთა წახალისება, დარჩნენ სახლში ავად ყოფნის შემთხვევაში;
- რესპირატორული ეტიკეტის დაცვის წახალისება, მათ შორის ხველის დაცემინების დროს ცხვირის და პირის დაფარვა;
- ერთჯერადი ხელსახოცებისა და ნაგვის ყუთების უზრუნველყოფა მომხმარებლებისა და საზოგადოებისთვის;
- სადუზინფექციო სამუშაოების ჩატარება.

საზოგადოებრივი ჯანდაცვის მითითებების შესაბამისად უნივერსიტეტში პერსონალს ან სტუდენტებს შორის დაფიქსირებული სიმპტომების შემთხვევაში:

- მოხდება პირის იზოლირება და შესაბამის სახელმწიფო დაწესებულების ინფორმირება.
- საშიშ ვირუსზე ან სხვა სახიფათო ინფექციურ დაავადებაზე დადებითი პასუხის შემთხვევაში უნივერსიტეტში შეჩერდება სამუშაო და სასწავლო პროცესი ნაწილობრივ ან მთლიანად, შესაბამისი სახელმწიფო დაწესებულების მითითების შესაბამისად.

- უნივერსიტეტში ჩატარდება სადუზინფექციო ღონისძიებები.
- პერსონალის/სტუდენტის თვითიზოლაციაში მოქცევის ან კარანტინზე გადაყვანის გადაწყველების მიღებასა და განხორციელებას უზრუნველყოფს შესაბამისი სახელმწიფო სამსახურები.

ქვეყანაში საგანგებო სიტუაციის ან/და კარანტინის გამოცხადების გამო სამუშაო და სასწავლო პროცესის უნივერსიტეტის ტერიტორიაზე შეჩერების შემთხვევაში სამუშაო/სასწავლო პროცესი გაგრძელდება დისტანციურად, ქვეყანაში საგანგებო სიტუაციის/კარანტინის გაუქმებამდე და სათანადო პირობების დადგომამდე.

უნივერსიტეტი უზრუნველყოფს სხვა ღონისძიებების განხორციელებას შესაბამისი სახელმწიფო ორგანოების მითითებების შესაბამისად.

განგაშის ზარი

საგანგებო სიტუაციების განვითარებისას ჩართვება განგაშის ზარი (წინასწარ შეთანხმებული ხმოვანი სიგნალის იმიტაციით) და ორგანიზება უკეთდება პირველ რიგში გასატარებელი შემდეგი ძირითადი ღონისძიებების განხორციელებას:

- „ორგანიზაციის“ თანამშრომელთა ევაკუაცია ხანძრის, შესაძლო დატბორვის ან ნგრევის ზონიდან;
- პერსონალის უზრუნველყოფა ინდივიდუალური დაცვის საშუალებებით;
- მატერიალურ ფასეულობათა ევაკუაცია უსაფრთხო ზონებში;
- სამაშველო და ხანძარსაწინააღმდეგო ღონისძიებების ჩატარება;
- კავშირი განხორციელდეს სატელეფონო საშუალებებით. სატელეფონო კავშირის მწყობრიდან გამოსვლის შემთხვევაში კავშირი განხორციელდეს სპეციალური რაციებით ან კურიერის მეშვეობით.

საგანგებო სიტუაციების მართვის შტაბის შეტყობინების სქემა

